

# No Tolas Ni Apostol Pablo Di Pilemon

## No Pakatonngan So Paytābwān No Nya Tolas

Si Pilemon, ki asa mabaknang a tawo a minyan do syodad a Kolosas. Iya, ki asa nanganohed di Jesus. Iya paw no akin adipen di Onesimo a nayyayo do bahay na a maynamot do nakaoma na do nakaadipen na.

Nayyayo si Onesimo do mateng a yanan, kan nakarapit do Roma. Dawri, maynamot do naikeddeng a plano ni Āpo Dyos, nadongso na si Pablo do bahodan. Do nakadngey nas innanawowaw ni Pablo a maynamot di Kristo, ki nanganohed kan nayparin a mapateg a kasidong ni Pablo.

Maynamot ta komwan, naktokto ni Pablo a machita na paybidihen si Onesimo do āmo naw a si Pilemon a nayayowan na. Dawa, iyaw nyaya tolas na di Pilemon a sit na do Kolosas, ki nangdaw so kapamakawan na di Onesimo a pinaybidi ni Pablo. Kan no hahawen ni Pablo, ki rawaten aba ni Pilemon a napakawan a adipen lang an dya asa dana kakteh a manganohed di Kristo.

No tawen a nakaitolas ni Pablo so nyaya tolas, ki do A.D. 61 mana 61 a katawen katayoka no nakaiyanak ni Āpo Jesus.

## No Naychakarwan No Nya Tolas

Pakatoneng 1-3

No Kapamadayaw Di Pilemon 4-7

No Kapangdaktaw A Para Di Onesimo 8-22

No Kapanawdyan Na 23-25

---

<sup>1</sup>Nyaya tolas namen, ki mangay dyimo mo Pilemon a mapateg a sit di Kristo Jesus. Yaken si Pablo a asa nabahod a maynamot do kapagsirbi ko di Kristo Jesus, kan iyaw rarayay ko dya, ki si Timoteo a kakteh ta do kapanganohed. <sup>2</sup>On, naytolas kami dyinyo mo Pilemon kan di Arpya<sup>a</sup> a mabakes a kakteh namen do kapanganohed kan di Arkipo<sup>b</sup> a rarayay namen a soldado ni

Kristo, as kan tabo manganohed saw di Kristo a makpekpeh do bahay<sup>c</sup> nyowaw daw.

<sup>3</sup>Myan pakono dyinyo parabor kan kaydamnayan no kapangtokto nyo a yapod Apo Dyos a Amang ta kan yapod Apo Jeso-Kristo.

#### No Kapagyaman Ni Pablo A Maynamot Di Pilemon

<sup>4</sup>Kakteh ko, pirmi ako a magyaman di Apo Dyos a maynamot dyimo do kada kapaydasal ko, <sup>5</sup>ta nadngey ko iyaw maynamot do kayit no kapanganohed mo di Apo Jesus kan rakoh a adaw mo dyirad tabo siraw tawotawowaw a manganohed. <sup>6</sup>On, paydaydasal ko tan do kayan mo a machisarsarita a maynamot do kapanganohed mo, ki maypaypangay paw kapakaawat mo do tabo pamindisyonaya a yapod Apo Dyos a myan dyaten a maynamot do kapachichasa ta di Kristo. <sup>7</sup>Magyaman ako pa di Apo Dyos a maynamot do adaw mo dyirad tawotawowaw a manganohed di Jesus. On, rakoh iyaw soyot ko, kan mahwahok ako na a maynamot dyimo, ta pinasalon-at mo iyaw aktokto dan manganohedaw a maynamot do adaw mo.

#### No Kapangdakdaw Ni Pablo Maynamot Di Onesimo

<sup>8</sup>Dawa, myan chakey ko a akdawen dyimo. Ta aran myan dyaken toray a yapod Kristo a mangbilin dyimo tan parinen mo no maganay, ki alit na, parinen kwabaw nawri. <sup>9</sup>On, chakakey ko manahes dyimo maynamot do adaw. Parinen ko nyaya a aran yaken si Pablo a malkem dana, kan sichangori, myan ako na do bahodanaya a maynamot di Kristo a pagsirbyan ko. <sup>10</sup>Dawa, mangdakdaw ako dyimo a ipaboya mo kasi mo di Onesimo<sup>d</sup> a nayparin a anak ko do kapanganohed di Kristo do kayan naw dyaken do nakabahodan kwaya. <sup>11</sup>Rawaten ko a do kachwaw, ki akmay abo maisidong na dyimo. Ki sichangori, rakoh danaw sirbi na dyaten a dadwa.

<sup>12</sup>Sichangori, maynamot di Onesimo a oltimo kos chadaw, ki paybidihi ko na dyimo. <sup>13</sup>On, paybidihi ko a aran chaskeskeh ko, ta chakakey ko a bidinen do dya a machasa pa dyaken do kayan kwaya do bahodanaya a maynamot do kapangasaba ko so Maganay a Damag tan iyaw akmaw pinakainawan mo a somidong dyaken. <sup>14</sup>Ki aran komwan, nangtokto ako a maganaganay pa an paybidihi ko. Ta chakwan ko an naw na dyaken, ki ari ko pad rinawat palobos mo a amo na. Asa pa,

<sup>a</sup> <sup>2</sup> No myan do aktokto dan kadwan, ki si Arpya, ki baket ni Pilemon. <sup>b</sup> <sup>2</sup> Si Arkipo, ki iyaw pangolo dan manganohedaw a makpekpeh do bahayaw ni Pilemon (Kol. 4:17). Siraw kadwan, ki bata da a si Arkipo, ki anak da Pilemon kan Arpya. <sup>c</sup> <sup>2</sup> Do dawri a chimpo, ki abaw kapilya da no manganohed. As dawa, nakpekpeh sa do asa bahay no manganohed. <sup>d</sup> <sup>10</sup> No chakey na batahen no ngaranaya Onesimo, ki "magsirbi."

chakey kwabaymo a piliten. Imo daw mangtokto an maypāngo kasidong mo dyaken.

<sup>15</sup>Sigoro, nawriw kinarwan na paw dyimo so dēkey a chimpo tan anchan maybidi dyimo, ki magnanayon dana. <sup>16</sup>Sichangori, iktokto mo paba a iya, ki asa adipen an dya mapatpateg pa a adayo. Ta maynamot do kapanganohed na, ki nayparin dana asa makadadaw a kakteh ta, naten dana dyaken. On, ta aran imo, rakoh pakono iyaw kadaw mo dya a maynamot ta kasidong mwaba lang do inawan an dya kakteh mo pad kapanganohed ta di Āpo Jesus.

<sup>17</sup>Dawa, an ibidang mo yaken a rarayay mo do kapanganohed ta, ki rawaten mo a akmas karawat mwaya dyaken. <sup>18</sup>An myan gatos mana ōtang na dyimo, ki yaken anchiw singiren mo. <sup>19</sup>Yaken si Pablo a naytolas so nyaya, kan ipirma kod mismo a kakamay ko tan myan sistigo mo a tongpalen ko kari ko a magbayad akonchi do tabo ōtang na dyimo. Ki aran komwan, machita paba ngata a ipanakem ko dyimo a ōtang mo dyaken kapanganohed mo kan abos pandan a byay mo. <sup>20</sup>Dawa, kakteh ko, padayawan mo paw nya akdaw ko dyimo a maynamot do kapanganohed taya di Āpo Jesus. On, torohan mo pakono yaken so kasoyot kan kaydamnayan aktokto a maynamot ta oyod a maykakteh ta di Kristo.

<sup>21</sup>Maynamot do kapagtalek ko dyimo, naitolas ko nyaya dyimo. Ta chapatak ko a tongpalen monchiw inbahey kwaya dyimo, kan chapatak ko pa a arwaro panchiw parinen mo kan inakdaw kwaya dyimo. <sup>22</sup>Ay on sawen, maparin abawri a isagānaan mo yaken so kwarto ko a yanan ko? Ta rakoh hahawen ko a atbayen ni Āpo Dyos kapaydasal nyo, as kan wayawayaan da yaken a magsarongkar dyinyo daw do Kolosas.

### No Kapanawdyan Na

<sup>23</sup>Si Epapras iyaw kapayngay ko a nabahod a maynamot di Jeso-Kristo, ki pakomostaan naynyo. <sup>24</sup>Mapakomosta pa saw rarayay kwaya a maytarabako a sa Markos, Aristarko,<sup>e</sup> Demas,<sup>f</sup> kan Lokas.

<sup>25</sup>Myan pakono dyinyo parabor ni Āpo Jeso-Kristo.

---

e 24 Ara. 19:29; 20:4; 27:2; Kol. 4:10    f 24 Kol. 4:14; 2 Tim. 4:10